

# Waani

## *Paisa Simiyame*

### *Iyoteparia*

---

#### **Kaayo tewaniame kaaweruma nayewaniame**

<sup>1</sup>Nee i'wa tiopachi Riosichi paparamewichioo, Te'ta Oochetiame tewaniame paamiratuamea, i'ka iyoteri iyotiamenia Kaayowichioo, pu'kao Riosi te'ta pichiwarichio, tísia no'o nakiya.

<sup>2</sup>Aamoo, tísia no'o kaawe e'riaopua Riosichi poonio, tísia kaaweruma yasitowa aamo kiajeraninia Riosio, yooma ihta aamo yoorao kaawe tiame machenasiwa, ta'iria yasitoniamie kihta kokoreka, nane'riamenia aamoo, tísia kaawe teetoamekopua Riosichi simiyameo. <sup>3</sup>Tísia kaawe erapakane aamo kaawe tiio tuuyetiaapa, ookapi wa'a o'inia e'enakamee poponiwaeo, puuua aamoo, ki se'wika teeto no'o tuuyekopa, pu'ka aamo Riosi pichiwarichi teetoa tehkiwachio. <sup>4</sup>Kihta epeche kaawe erapamenia noochio, ki i'kachitiao: yooma Riosichi kukuchiwao, Riosie Weratiamechi kaawe ohjoameko tuutiameo, Eesusichi simiyame te'ta pichiwarichio.

<sup>5</sup>Muuu no'o tísia kaawe e'ria Riosichi poonia, muuua tísia kaawe teetoamepua wa'a Riosi tiopachio, poponiwachio pipiniwaopua tiameo, senepi ku'ika yasitoamekapaomua, wa'a Eesusichi paparameo, epeche pehjiomua, ahkaoi o'inia enapameo, Eesusichi simiyame ma'masitiameo. <sup>6</sup>Puuu ahkaoi ohjoka nayewatukamea, wa'a chaachapakamepua i'wa tiopachi e'ensaoopua yooma inamuachio, kehkisi aamoo ki nu'uti nakika ahpo ku'itiamekopua. Muuua wa'a aamo tiopachi mochikamee ku'yame enesaamua wa'ami u'matopame Eesusichi simiyame masitiameo, ihtaewi oowewiame enesaamua pu'kao pooechi nakipuameo, no'o kaawe itipiwa ihsimeri muuua, Riosio te'ta pu'ka yorajera ihsiamie enemirimua. <sup>7</sup>Pu'kao, aamochiche Riosichi paparamechiche uumeripua ku'iwao, pu'ka Eesusi Riosie

Weratiame tehkiwachi ahpo nokisimiaopua, kihta aaata ki Riosichi paparama ku'liwa uusika nokisiamekopapua. <sup>8</sup>Pukaepa teemekamera Riosichi paparama ku'itomeripua pu'kao, iinuemichioopua pu'kao, ihta ahpo ahjae nokisipuameopua, pu'ka te'ta Riosichi simiyame pichiwari nayewatusiwachioopua.

### **Rioteje kiisi kaawe ihsiam**

<sup>9</sup>Neeea iyotepakamepa seenepio, pu'ka Rioteje tioparachi nanapawiamechioopua, nape Riotejea kiisi taamo nahkekapua wa'ao, taamo Riosichi eename tuuyewario, wa'ami u'matopameopua ku'inarekao, Riosichi simiyame masitiameo, apoeche e'ramekapapua te'ta ahpo paamiratuameo. <sup>10</sup>Pukaepa neea wa'a Rioteje tioparachi simisaopania, yooma tuuyemenia wa'a tiopachi nanapawiameopua, aachin cheeka tisia taamo na'ariamekoopua Riotejeopua, yooma ihta wihtuki cheeka oiyapua tamochio. Puuua ki soparachitia ahpo cheeka oiyao, wa'inamepua wa'a ahpo tiopachi asipuawichioo, Eesusichi simiyame masitiameopua Riosichi poponio; wa'api ahpo tiopachi nanapawiameoi tisia wa'iniamepua asipumichioo pu'ka Riosichi simiyame ma'masitario. Yooma aaata wa'a tiopachi mochikameo, ahpo ta'pechi asipunariameopua Eesusichi simiyame nayewatuameo, ujumapuamepua wa'ao, ahpo tiopachio, ki ahpo tiopachi mochtomichioopua.

<sup>11</sup>Muuu no'o te'ta nakiya poonia, ka'te wa'achi ihsimitia muuua, ihtaai aaata ki ka'karuma nokayao; te'ta kaawerumarache ihsipuapua ohso kaaweo. Kaaweruma ihsiam, kaawe tiamepua Riosichio, nape ki kaawe ihsiam, kiisi kaawe tiamepua Riosichio.

### **Reemetio nayewaniame**

<sup>12</sup>Nape Reemetio tewaniamea, tisia kaawe tiame nayewaniamepua. Yooma pu'ka te'ta machiyamea, te'ta pichiwako tuuyamepua, Reemetio wa'a chaachapaniameo. Teemeai wa'achi chaachapamepua, te'ta pichiwako tuukao, Reemetio wa'a chaachapaniameo; muuu wa'api ai te'ta nane'riamepua pu'kao, te'ta pichiwakopua taamo chaachapao.

### **Kujuyachi chaniwa wa'asi**

<sup>13</sup>Ki ookapi iinuenia aamo chaanemio, nape ki iyoterichi aamo cheenariamenia pu'kao. <sup>14</sup>Ku'we wa'a siimo o'rapa, nooe aamo nayewenariapa wa'a enasapao.

<sup>15</sup>Wa'asi ihjiapa no'o aamo tuuyaa. Kaawe e'raka yasitojeramechenia aamo iikachio. I'wa no'o ahjama mochikamea aamo kaawe e'riame, aamo teepotenapua. Muuua tiameo, teepotaka kiamitiapua, yooma pu'ka taamo kaawe e'reka mochikameopua wa'ao. Wa'a ikisa naaju.